

Obraćanje Iana Predsjedništva BiH Šefika Džaferovića na prijemu povodom Dana državnosti Bosne i Hercegovine, 25. novembra 2018. godine
25.11.2018 21:35:51

Ekselencije,
Dame i gospodo,
Dragi prijatelji,
Predstavljajući mi posebnu čast i zadovoljstvo da vam poželim dobrodošlicu na prijemu povodom Dana državnosti Bosne i Hercegovine.
Danas obilježavamo jedan od najznačajnijih datuma u historiji naše domovine.
Narodi ove zemlje imali su hrabrosti da se zajednički suprotstave fašizmu tokom Drugog svjetskog rata. Ali, imali su i viziju i mudrost da u tim teškim historijskim okolnostima, na Prvom zasjedanju ZAVNOBiH-a u Mrkonjić-Gradu, na današnji dan 1943. godine, obnove i potvrde državnu i teritorijalnu integritet Bosne i Hercegovine.
Dokumentima koje su usvojili delegati ZAVNOBiH-a iz svih dijelova Bosne i Hercegovine i iz svih njenih naroda, potvrđeni su i njen multietnički karakter i ravnopravnost svih njenih građana.
Na tim temeljima, pola stoljeća kasnije, opet u teškim historijskim okolnostima agresorskih nasrta, Bosna i Hercegovina se izborila za svoju nezavisnost i postala međunarodno priznata država, punopravna članica Ujedinjenih naroda.
Mnogi patrioti su položili svoje živote na bedemima odbrane Bosne i Hercegovine, cjelovite, multietničke države jednakopravnih ljudi – onakve za kakvu se izborila prethodna generacija i kakva je odbranjena devedesetih godina prošlog stoljeća. Dan državnosti je prilika da ih se sjetimo i da im se, uz dužno poštovanje, zahvalimo što danas imamo državu.
Dame i gospodo,
Dejtonskim mirovnim sporazumom su zaustavljeni agresija i rat u Bosni i Hercegovini. To nije bio pravedan mir, kako je tada rekao prvi predsjednik Bosne i Hercegovine rahmetli Alija Izetbegović, ali je ipak bio pravedniji od nastavka rata.
Od potpisivanja Dejtonskog mirovnog sporazuma smo prešli dug i mukotrpan put. Napravljeni su značajni iskoraci na unutrašnjoj reintegraciji Bosne i Hercegovine i njenoj integraciji u Evropsku uniju i NATO. Provedene su brojne i teške reforme kojima je utvrđen i ojačan unutrašnji i vanjski suverenitet naše države.
Pred nama je još mnogo posla. Prije svega, sada se moramo fokusirati na uklanjanje svih oblika diskriminacije i popravljanje životnog standarda naših građana, naročito mladih, kako bismo zaustavili proces njihovog odlaska.
Postoje brojna područja diljem Bosne i Hercegovine na kojima našim građanima nisu omogućena elementarna prava. To je posebno izraženo u povratničkim sredinama, gdje se povratnicima uskraćuju osnovna ljudska prava. Takva praksa je nedopustiva i mora se mijenjati. Svaki građanin na svakom pedlju naše države mora nesmetano i jednako uživati sva prava i slobode koje su mu zajamčene Ustavom Bosne i Hercegovine.
Danas svjedočimo ponovnom oživljavanju retrogradnih velikodržavnih politika koje su kroz historiju bile najveća prijetnja opstojnosti Bosne i Hercegovine. Pokušaji osporavanja suvereniteta i nepoštivanja Ustava, zakona i institucija Bosne i Hercegovine sve su u staliji i agresivniji. Zbog toga je vrijeme da iznova zbijemo redove i zajednički pokažemo da ima više onih koji ovu zemlju vole i poštuju, koji su spremni da čuvaju njenu državu i suverenitet i da brane demokratske vrijednosti i ravnopravnost svih njenih naroda i građana.
Ukoliko budemo jedinstveni, uopće ne sumnjam da ćemo uspjeti.
U to ime, svim građanima Bosne i Hercegovine čestitam Dan državnosti Bosne i Hercegovine.
Živjela Bosna i Hercegovina!
Hvala vam!